



Optužena za korupciju u pravosuđu / AMER KAJMOVIĆ

Azra Miletić je znala da je prisluškuju

Kume, posudi 6 ili 7 hiljada eura, okreni dva, tri broja, čuje se kako S1 govori Senadu Šabiću

U Sudu BiH jučer je svjedok Aldin Mustafić, istražitelj **SIPA**, nastavio puštanje razgovora iz 2014. godine između optužene Azre Miletić, suspendovane sutkinje Suda BiH, i svjedoka S1. Tužilac Mirza Hukeljić, prije puštanja snimka, pojasnio je Sudu da Miletić u jednom razgovoru govori S1 o svjedokinji Vlatki Maksimović, ali to se tokom slušanja nije moglo čuti zbog lošeg kvaliteta samog snimka.

- Miletić je saznala da se razgovori između nje i svjedoka S1 slušaju, pa je odlučila preko Maksimović nastaviti komunikaciju sa S1. Optužena je željela i upozoriti S1 da bude oprezan, pojasnio je tužilac.

Obrana je ponovo imala prigovore na komentare tužioca, te općenito relevantnost dokaza.

Pušten je razgovor između Maksimović i S1, gdje mu ona govori da se "hitno moraju sastati i da ne bi preko telefona". Krajem decembra 2014. oni se sastaju. Nakon susreta, S1 zove Senada Šabića i govori mu da su se pojavili problemi, odnosno da je izgubio komunikaciju sa optuženom.

"Kume, posudi 6 ili 7 hiljada eura, okreni dva, tri broja", čuje se kako S1 govori Šabiću, ali se ne čuje zbog čega to traži od njega. "Ma, u p.... m..... otišlo sve", govori iznervirano Šabić.

Miletić je optužena da je primila novac od Šabića i Rame Brkića, bivšeg komesara policije USK-a, kako bi tada kao sutkinja Apelacionog vijeća uticala na ishod drugostepenog postupka u kojem im se sudilo za trgovinu drogom.

E. G. P.